



# KENYATAAN MEDIA

---

## **MAJLIS PENYAMPAIAN WATIKAH PELANTIKAN RENJER KOMUNITI DI BAWAH PROGRAM PERLINDUNGAN DAN RONDAAN BIODIVERSITI (*BIODIVERSITY PROTECTION AND PATROLLING PROGRAMME - BP3*)**

---

Pada hari ini, saya telah menyampaikan watakah pelantikan Renjer Komuniti bagi membanteras jenayah melibatkan hidupan liar di bawah Program Perlindungan dan Rondaan Biodiversiti (*Biodiversity Protection and Patrolling Programme - BP3*).

Kementerian Sumber Asli, Alam Sekitar dan Perubahan Iklim (NRECC) melalui Jabatan Perlindungan Hidupan Liar dan Taman Negara (PERHILITAN) Semenanjung Malaysia telah melaksanakan Program Perlindungan dan Rondaan Biodiversiti (*Biodiversity Protection and Patrolling Programme - BP3*) bermula secara rasmi pada tahun 2020.

Program BP3 melibatkan Jabatan PERHILITAN, Jabatan Perhutanan Semenanjung Malaysia, Polis Diraja Malaysia (PDRM) serta agensi-agensi penguatkuasaan dan badan bukan kerajaan (NGO) bagi membanteras pencerobohan, pembalakan haram serta pemburuan hidupan liar di kawasan *hotspot* dalam kawasan perlindungan di Semenanjung Malaysia termasuk Taman Negara, Rizab Hidupan Liar (RHL), Taman-Taman Negeri, Hutan Simpanan Kekal (HSK) dan Tapak Ramsar.

Renjer Komuniti terdiri daripada Veteran Angkatan Tentera Malaysia (VAT), Veteran PDRM (VPDRM), masyarakat Orang Asli (OA) serta komuniti setempat yang dilantik bagi menangani isu pencerobohan, pemburuan serta pembalakan haram.

Seperti yang diumumkan oleh YAB Perdana Menteri dalam ucapan Belanjawan 2023, RM50 juta telah diperuntukkan bagi inisiatif perluasan Renjer Komuniti dan bilangan Renjer Komuniti pada tahun 2023 akan ditingkatkan kepada 1,500 orang.

Pelantikan renjer di kalangan komuniti ini dapat mengukuhkan penguatkuasaan dan menyediakan peluang pekerjaan kepada rakyat terutama dalam kalangan Orang Asli/Asal, pesara tentera dan pesara polis serta komuniti setempat. Usaha murni ini selari dengan dasar rukun MADANI ke arah mewujudkan Malaysia yang mampan, ihsan dan sejahtera.

Kepakaran VAT, VPDRM dan komuniti OA dalam meningkatkan keberkesanan penguatkuasaan bagi membanteras kegiatan pencerobohan, pembalakan haram serta pemburuan hidupan liar telah terbukti.

Secara keseluruhannya dari tahun 2019 hingga tahun 2022, sebanyak 240 kes direkodkan di bawah BP3 yang melibatkan tangkapan seramai 349 orang pesalah warganegara Malaysia dan 111 orang warganegara asing dengan jumlah sitaan lebih daripada RM112 juta. Selain itu, sebanyak 1,875 jerat yang dijumpai di dalam kawasan operasi telah berjaya dimusnahkan.

Saya berharap pelantikan Renjer Komuniti ini dapat membanteras aktiviti-aktiviti pemburuan dan pencerobohan haram di kawasan habitat hidupan liar demi memastikan khazanah biodiversiti negara kekal terpelihara untuk generasi masa kini dan masa hadapan.

**NIK NAZMI BIN NIK AHMAD**  
**MENTERI SUMBER ASLI, ALAM SEKITAR DAN PERUBAHAN IKLIM**

**6 MAC 2023**

